



眞繫

ル 5
3254
7



凡 5
3254
7

滇繫書目

山川二册下

趙州師 範荔扉纂輯

蒙化直隸廳

永北直隸廳

景東直隸廳

普洱府

臨安府

元江直隸州

滇繫 五之二 山川目錄

六二七

鎮沅直隸州

曲靖府

潯江府

廣南府

開化府

東川府

昭通府

廣西直隸州

附滇南紀略 雲南紀略 麗江游記 昆明池考

滇繫

山川繫

趙州師 範荔 扉纂輯

蒙化直隸廳

斗斛山 城北三里亦名覆屋山亦曰棋盤山又城東有天
臺山望見百里外又有元珠山山有白浮圖相傳武侯建以
鎮蒙者 甸尾山在廳南十里下有溫泉舊有甸尾巡司戍
守又城東北十五里有伏虎山

巍山 廳東南二十里峰巒高聳冠于羣山亦名崑寶山蒙
氏之初嘗耕牧于山之麓志云昆雌江出于此東北流入趙

滇繫 五之二 山川

州界合于禮社江

龍吁圖山 城西北三十五里初蒙氏龍伽獨者以唐貞觀中將其子細奴邏自哀牢而東遷居其上部衆曰盛高宗時細奴邏入朝授鬼州刺史築城高三丈周四百餘丈后自稱奇王號蒙舍詔今有浮圖在山上亦曰巉吁山其相接者又有天馬御筆諸山又金牛山在廳西北四十里亦名塞子山石母山 城北七十里出石黃及雄黃有泉流爲賸中溪南入羅蓋江又天耳山與石母山相接卽甸頭山也舊有甸頭巡司戍此志云廳西南二百里有鳳凰山亦名烏弔山蓋傳

訛耳

陽江 在城南源出甸頭山花判澗南流至甸尾巡司又東南流九十里入定邊縣界又有錦溪在城東一里西北流達于陽江

樣備江 廳西百五十里一名神莊江自大理府趙州西境流經永昌府永平縣之打牛坪又廳西北百二十里之樣備驛有樣備橋跨其上爲蒙化永平之界又南流入順甯府而會于瀾滄江本名漾濞江譌爲樣備云

瀾滄江 在廳西南百五十里自永昌府流入境又東南入

順甯府界江之南岸有馬耳渡 蔡陽河在城南源出東山
縣流入陽河又教場河在廳北二里又北二里爲繫馬椿河
又有五道河在廳南七里俱流注于陽江

蒼山 在定邊縣北圖經云青峰山在定邊之北者名曰蒼
山蓋一山高大分爲五縣之鎮也志以縣治後真武坐臺爲
鎮山云 湧翠山在治北十里有刀思郎遺壘又北有螺盤
山山頂盤旋形如螺髻故名明初西平侯沐英與刀思郎戰
于此山之西產青礫石礦上有自普關又陶羅山一統志云
在縣治西高可千仞

定邊河 在縣南其上流一自趙州流入卽禮社江也一自
蒙化羅場流入卽陽江也合流經縣之和木村五六月間漲
水洶湧人不敢渡縣東又有環川縣西又有牟沮河一名零
川相近又有刺崩下流俱合于定邊河入元江州界

自普河 在縣北螺盤山上爲控扼之地 武侯臺在縣東
五里列界村相傳武侯屯兵處遺址尙存

永北直隸廳

瀾滄山 在城西南三里高二百餘丈衛與驛皆曰瀾滄以
此又烏洞山在城西二里上列五峰下有洞廣僅丈餘深不

可測又城西三里曰三刁山山途險窄相傳武侯征南時所
開 烏鴉山在城南十里山形如削玉爲廳之勝

東山 城東一里亦曰觀音箐山之西麓接香爐峰有三山
鼎立又三泉山在城東南三里山有石崖涌出三泉民資以
灌溉

甸頭山 廳北三十五里羣峰竦列林木森蔚土人于此牧
羊又名牧羊坪志云城西北三里有紅石巖亦曰赤石厓厓
畔有泉味如醴下流入于金沙江

九竜山 廳南百里山有九頂一名九頂山高萬餘丈四顧

可千里又廳東南百里有大波難嶺高二萬餘丈巔有龍湫
又伏虎山在廳南百三十里山勢雄峙望之如伏虎

金沙江 在廳治西自麗江鶴慶流入境由西東環遶于廳
治一名麗江洪武十六年傅友德自鄧州過金沙江改北勝
府擒僞平章高生復平麗江巨津等州是也詳見大川金沙
江

陳海 廳南四十里周八十里相傳昔本險地有陳姓者居
此一夕沉爲海或作程海又程湖在廳南五十里漑田可千
畝又廳東南三十五里同浪峨海下流俱入于金沙江

桑園河 在廳西南源自大理府雲南縣行廳西南百五十里之桑園村下流入金沙江又有五浪河在廳西五十里自浪渠州流入界又有三渡河在廳南百四十里其水旋繞三面下流俱入于金沙江

九龍潭 廳西十五里有泉九眼溉田可百餘畝其下流亦入金沙江又大龍潭在廳南百四十里又南九十里曰小龍潭居民俱引以灌溉

小吉都寨 在廳東五里志云元時土酋高斌詳屯兵于此白角山 在浪蕩西北白角鄉又綿綿山在西南綿綿鄉兩

山皆高峻爲州之望

羅易江 在浪蕩東合數溪而流入永甯界白角河源出綿鄉經白角鄉而入于西番

千木山 永甯東南十五里高八千餘丈根盤百餘里一名獅頭山亦名孤山又有甲母山在東岩巒蒼翠竦入霄漢

瀘沽湖 永甯東三十里湖周二百餘里中有三島高百丈又魯窟海子在千木山下周回一百里中有小山名水寨或曰卽瀘沽湖也土官築水砦于島上云又有海門橋在永甯治西魯窟海子之水流經此通四川打冲河達川江橋外入

鹽井界

勒汲河 在永甯北源出西番流入境東流入四川鹽井衛界又有勒汲墩密邇吐蕃居人與番襍居常被凌擾築此墩于河上以為界云 羅易江在永甯南自瀾滄衛葭渠州北流逕永甯境入于瀘沽湖

瓦都石 永甯東北六十五里與四川鹽井衛接界舊為番部戍守處旁有溫泉

景東直隸廳

景董山 在廳治西昔為蠻寨洪武中建衛城于山上其城

西據山巔又有小城亦據山頂形如偃月謂之月城

邦太山 在廳治東高聳延長有險可恃土官世居其麓曰

陶猛山 錦屏山在廳南一里其相接者又有孟詔山治東

有邦太之秀南有孟詔之雄是也又雀籠山在廳北三十里

一峯突兀絕頂盤圓

蒙樂山 廳北九十里與者樂甸長官司接界一名無量山

高不可躋連亘三百餘里中有石洞深不可測一峯突出狀

若空峒其南有泉流為通華河北有泉流為清水河俱東流

入于大河山上又有毒泉人畜飲之皆斃蒙氏封此山為南

嶽志云城東景董山卽此山之支隴也餘附見名山

瀾滄江 廳西南二百里自雲州流入境又東南入鎮沅界
詳見大川瀾滄江

大河 在廳東其上流卽定邊河也自定邊縣南之阿笠村
流入境又合三塗河引而東蒙樂山之清水河通華河俱合
流焉又東入楚雄府鎮南州境流入于馬龍江

篋泉 在廳北衛城爲洪武中建衛城中無井泉指揮袁賢
以竹篋引蒙樂山泉入城鑿池瀦之上覆以亭取汲于此因
曰篋泉又有土井產鹽

母瓜關 廳南百里又北一百五十里有安定關又東南一
百二十里有景闌關皆控禦地也

蘭津橋 滇記云舊在廳西南跨瀾滄江上後漢永平初所
建永樂初修高廣十仞兩岸峭壁林立飛泉急峽危峯森羅
上下鎔鐵爲柱以鐵索繫南北爲橋自古稱爲巨險 大河
橋在廳東二里跨大河上覆瓦屋四十九楹

普濟府甯洱縣

錦袍山 在城東二里一名光山山勢雄峙上有壘址相傳
武侯南征結營於此

太乙山 在城西十里一名老翁山絕頂孤峯高出雲表

大川原 在城南七百餘里車里宣慰司界廣袤千里蠻人

參象於此旁有山曰孔明寄箭處有孔明碑

六茶山 曰攸樂即今同知治所其東北二百二十里曰莽

芝二百六十里曰葶登三百四十里曰蠻磚三百六十五里

曰倚邦五百二十里曰漫撒山勢連屬複嶺層巒皆多茶樹

斑鳩坡 在思茅東北二十里高出眾峯即天氣晴明常有

雲封霧鎖路行絕頂雲截山腰經過者如置身霄漢之上有

諸葛營

整董江 在城東南一百八十里入於猛撒江

猛撒江 在城南二百四十里合威遠江入九龍江

小江 在城西一百二十里發源鐵廠合威遠江入九龍江

清水河 在城南二十里流入普藤大開河合瘴氣河會漫

達入於九龍江

九龍江 在攸樂南五里為瀾滄江之委自西北流繞山勢

九嶺相向矯若游龍故名

扒泥河 在攸樂東北一百四十里東流入漫達河

漫達河 在攸樂東北一百八十里繞五茶山西南流入九

龍江

南澗 在思茅南四十餘里繞西北會清水河入猛撒江

平塘 在思茅南二里衆水所歸遂成巨浸

龍虎地 在城北三里迤邐南來氣象萬千其過峽處斬如
巉巖相傳武侯南征時鑿其脈以制蠻夷

祭風臺 在六茶山之中登其上可俯視諸山相傳武侯於
此祭風又呼爲孔明山

孔明塔 有二一在九龍江之西南接莽于孟良界高十丈
許相傳爲孔明所建有塔倒歸流之讖雍正六年其塔畝向

東北識者謂東北爲神京所在歸流當驗七年逆夷平果改
設流官一在九龍江之南六里許高十丈餘相傳亦武侯所
建旁有樹一株名萬年青玲瓏環抱最爲奇異塔後卽武侯
立營處

整董井 在攸樂南二百五十里蒙詔時夷目叭細里佩劍
遊覽忽遇是井水甚潔細里以劍測水淺深歸數日視其劍
似白鏹所鑄者疑之斷以斧劍鐵悉爲銀復跡之不得其處
歷傳其事後土官襲職務求此水沐浴得者夷民愈敬服焉
六茶山遺器 俱在城南境舊傳武侯遍歷六山留銅鑼於

攸樂置鑄於莽芝埋鐵磚於蠻器遺木柙於倚邦埋馬鐙於
革登置撒袋於慢撒因以名其山又莽芝有茶王樹較五山
茶樹獨大傳爲武侯遺種夷民祀之

祭鑼洞 在莽芝山半石洞中有銅鑼一匡郭剝蝕夷人每
於春耕時取鑼祭之祭畢仍置故處秋時再祭則年穀豐稔
或不誠卽歲歉相傳武侯所遺奉爲神物

諸葛營 在城東北斑鳩坡下諸葛武侯擒孟獲直抵莽緬
往來經過駐軍於此址尙存

臨安府建水縣

寶山 城西南一里相傳山產寶石夜有火光又里許爲樂
榮山相傳山泥有香作餅餐之不饑又象山在府南五里以
山形如象而名

石巖山 在府東十五里或謂之蒙山山巖有洞異龍湖瀘
江諸水流入此洞復流出入阿迷州界志云山峭壁千仞其
受水洞合五河之水滙爲一泓折而入西連岡疊嶂綿亘數
百里爲郡城右臂又滇記云蒙山五里有巖洞亦謂之顏洞
以遷客顏姓所開而名洞有三曰雲津洞今名水雲洞門可
容數百人曲逕縈迂衆水伏流其中東會于盤江遊者架橋

列炬而入巖洞后曰南明洞上有兩穴陽光射入中多奇勝
曰萬象洞巉岩絕險躋石磴數千級隱隱聞風雷聲亦曰昫
町三洞

火燄山 府西北十里有硫黃氣履之灼足著樹卽焦人
臥其上可去濕疾又黑冲山在府西北四十里雲樹深黑經
年不霽多瘴癘人不敢往又有石門在府西北百里箐口鑿
石爲門以通車馬下臨曲江險狹可守

判丈山 府南五十里高千餘仞中有三峯竦峙段思平外
舅襲判者常居其上因名后以地拱學宮改曰判丈山嘉靖

中又易爲煥文山 連雲山在府南三十里山高竦峙有雲
氣旋遶因名又有晴山在府北二十里一名北嶺山勢嵯峨
林木葱蔚與判文對峙爲一郡主山

瀘江 在府南源自石屏州異龍湖東流逕府境入阿迷州
南爲樂蒙河入于盤江 曲江在府東北九十里源出澂江
府新興州由嶠峨縣石屏州會諸水流入境又東入于盤江
夏秋水溢洑洞可畏

禮社江 在府西源出大理府趙州之定西嶺流經楚雄府
合陽江之水爲定邊河東南流經鎮南州爲馬龍河又南經

碕嘉而入新化界謂之摩沙勒江又歷元江州東南入府西南界經納樓茶甸爲祿豐江歷虧容甸爲虧容江過蒙自縣爲梨花江又東南流入交趾界合于清水江
建水 在府城東廣五畝今堙塞過半元志建水城每秋夏之間溪水漲溢如海夷謂海爲惠劇故以惠麼名城蓋卽此水也 白龍潭在府西北二里灌溉甚溥亦曰白龍泉有橋跨其上又東北有甘泉甚清冽汲之不竭又蓮花池在府西二十里廣二里波濤壯闊民引以溉田

石屏州

乾陽山 州北五里高五百丈上有石洞林木鬱蔥 來玉山在州東十五里產石如玉又州南十五里有鍾秀山產紫石可爲研山高二百餘丈綿亘百餘里其西北又有寶山產石似員珠今州西有寶秀驛兼立寶秀巡司蓋皆以山名巡司裁

曲江 在州東自河西縣流入界又東入建水界 落矣河在州西八十里闊三丈源出元江州南流入虧容甸今有落矣河橋又五塘溝在州南有五溫泉注其中資以灌溉 異龍湖 在州治東有九曲周百五十里中有三島其次島

曰孟繼龍有蛇蟲不可居昔時蠻酋每竄罪人于此中島曰小水孰蠻居其上築城曰小水東城今名空斷山其大島曰和龍立城其上漢名水城元至順初雲南諸王禿堅等作亂攻掠郡縣石屏鎮將朱寶以和龍島有壘塹可保引衆據守賊帥戰艦來攻寶拒却之三島環峙皆巨浸東流至府境爲瀘江

阿迷州

烏充山 州東十五里一名東山東山口巡司蓋置此山之西爲祿豐山又西爲逢和山三山相連環抱州治

買吾山 在州東南萬厯初撫臣鄒應龍擊逋賊于此忽震雷殺賊數人因易名曰雷公山有南洞亦曰通靈洞鄒應龍記云阿迷州南有巖穴數處舊爲逋藪卽買吾諸山也
旁甸洞在州東南百四十里有聲如風雷又州西南二十五里集甸境有傳聲洞云

交崗 在州南其地東西連互與交阯分界天啟二年水西安邦彥作亂霑益土酋應之烏撒安効良復叛引兵入霑益抵交岡犯安南長官司土官沙源擊走之志云交崗舊屬安南長官司后爲州界交人亦立戍守于此又有地名南外亦

爲交阯分界處也

盤江 州北二十里府境之水自澂江府新興州經建水縣界流至此俱滙爲一江流浩蕩犇軼乃十八峩夷人出沒之限隔也州與彌勒亦卽此分界又爲南盤江之別源也

樂蒙河 在州東北上源卽瀘江也自建水流入境回折而東入于盤江 火井在州東北三十里其水溢出于田常有烟氣投以竹木則火然夜則有光

合江口寨 在州東宋皇祐初儂智高敗遁深入大理狄青遣將楊文廣追之至阿迷州合江口不及而還是也或曰合

江口卽三江口盤江與衆水合流處

多莫舖 在州南滇程記自教化三部而北有合苴河箐口又爲教化河州近界有瑣瑣城又北至歪豆山又北次多莫舖乃至州治渡盤江至彭堡交彌勒界爲北走會城之通道又滇記云州有阿迷矣馬羅台三驛

蛇花口 在州北爲州境之險又州境有俱革竜山勢險惡夷酋往往恃此爲固

甯州

萬松山 州東九里山麓盤回峰頂峭立上有松林四時花

木又登樓山在州東南二十里高可千丈周八十里登之遠近之景舉在目中嶺有池方百步又天平山在州西南云自登樓山至天平山六十餘里渡江道過納樓茶甸木角山在州東百三十里地名備樂村產蘆甘石舊封嘉靖中開局鑄錢取以點銅自是復啟又東爲陽峯山夕倒影金紫萬狀中有龍洞分上中下凡三幽奇流麗不可究 琅玉峰在州北五十里岩石磷磷下瞰澗江府之撫湖波光涵浸如碧玉然一名石鐘岩以有石如懸鐘也去州北有竹子山道出雲南府宜良縣

婆兮江 州東六十里源自澗江府撫仙湖流經州境婆兮甸下流入盤江 浣江在州西南三里水由州北潭流下夾岸林樹陰森爲行客餞別之所經州南又東于婆兮江志云州南有瓜水浣江之水自北至思永之西至轉而東則丁矣冲之水與之俱會于茶部衝形如故名思瓜河在城南四里卽海眼泉水甚清海口有池池

高河泉 在州西南四里團山頂外窪中窪周二百餘丈涸亦不溢又州東北十里有嶺巖泉兩岸相對下有溪

泉自山巔下如瀑布然

通海縣

秀山 在縣南七十里又名菁山列翠如屏下瞰長河卽海子地舊有啟祥宮大理段智祥時所建山半又有判府泉亦因釁判而名王奎云踰嶺以南干淵絕壑通海爲最勝通海數十里峻壑遙峰秀山爲最勝 諸葛山在縣東南三里昔武侯南征屯兵于此因名

通海湖 縣北三里源自河西縣界注于此周八十里似環而缺一名杞麓湖俗名海子 新生泉在縣東十里可溉田

百畝

河西縣

琉璃山 在縣治北元時土酋建城寨于其上凡五層其西爲普應山又有佛光山在縣西十里 螺髻山在縣西五里山峰雙峙因名又碌溪山在縣東北山多石近溪四周皆水卽碌溪河也通海之源出于此

曲江 在縣東自嶧峨縣流經此又東入石屏州界 祿平江在縣西五十里一名治夷江源自新興州流經縣境東入于曲江

碌碡河 在碌碡山下自縣北水磨村入周迴八十里中產魚族甚美流經通海縣爲通海湖 東湖在縣東南二十里延四百步袤三百步其北自西湖延百步植隄蓄水資以溉田又縣北有三龍泉其西南一里有九龍泉延百步皆有灌溉之利

回陀關 在縣北三十里蒙氏所置亦曰萬松營元至元二十年立元帥府于此爲商旅輻輳之地明初廢于兵火關有曲陀巡司萬厯中裁

龍馬槽寨 縣北五十里相傳常有龍馬出此因名昔爲蠻

曾恃險處又韃靼營在縣治之東湖旁蒙古嘗屯兵于此故名

嶧峨縣

桂峰山 縣南二里高峰峭拔上多桂樹其相連者爲龍山下有龍泉四時不竭又嶧峩山在縣東北一里縣北又有萃秀山環擁縣治 又東南九十里五鳳山五山連峙其勢如飛山麓有鳳山洞

三元洞 縣西十五里兩山並峙東西二門高十餘丈洞分二門一巖可容百人又有筇川洞在縣西百里 邃巖縣西

二百二十里興依鄉深邃廣闊舊有興依鄉巡司巖在其南
萬曆中可廢

曲江 在縣東自澂江府新興州流入境又合流河在縣東
南南里一源自新平縣流經縣北爲大河一源自石屏州流
經縣南爲小河合流入于曲江

丁癸江 在縣西北一百五十里源自三泊流經丁癸村其
水深闊居民刳大木爲舟下流入于曲江

蒙自縣

目則山 在縣西三十里漢語譌爲蒙自其山橫列二十餘

峰秀麗如畫百里外舉目皆見元史山有古城白夷所築下
臨巴甸故縣蓋治此

雲龍山 在縣東二十里迴環盤遶凡數十里中有石室可
坐千人又有石洞容百人經行此夜宿其中其餘危峰森秀
林箐深廣峰壑幽勝不可名狀又北爲小雲龍山亦奇峭

耳鑼山在縣東北三十里每風雨雷電自山峰中起年必大
豐土人以爲驗東有仙人洞四面石壁懸注如鐘鼓

羨哀山 縣東九十里其上石筍林立絕頂平坦中有三池
水草四時豐衍宜牧放

梨花江 在縣東南由納樓茶甸境流入縣界其上源即禮社江也又倘甸河在縣東南七里流入梨花江

長橋海 縣東二十里架木為梁長十餘丈四面皆水又二十里為矣波海中多魚蝦海菜志云縣西南二十里之水曰西溪有二一出銀礦一出錫礦云又有草湖在縣治南百步蓮花灘 在縣南為入安南之道即瀾滄江下流交趾洮江之上流也永樂初沐晟出蒙自蓮花灘進討安南嘉靖中莫登庸作亂撫臣汪文盛以蓮花灘當交廣水陸之衝遣兵據其地為諸夷聲援登庸大懼即此輿程紀由蓮花灘達安南

之東都可四五日而至云

楊柳河關 在縣西南近王弄山長官可山高箐密深險可恃志云自關西南地名老寨旁有白木樂龍老大等箐及烏溪石洞皆險僻也

發果寨 在縣東南旁有五山峻拔險固可恃 八寨在縣南滇紀自老寨霧露站菁酒哈諸地至八寨又進至江底其旁曰猛撒菁渡江即交趾界又有啞得白箐自溪諸山南出之道也渡江有交趾境內阿別波哨滇紀猛撒至交趾境內北蘭州三十里

賀謎寨 在縣東南滇紀縣有還北山去八砦二十里餘又南至大江地名安邊縣縣至底泥又前渡三岔河至賀謎其地有方山相接正中地名漫老左曰磨莫右曰八洒俱近安邊自漫老至江底崇山峻嶺旁有橫角榆諸處江南爲籠陰山箐入交趾界
柏木蘆寨 在縣南據山絕頂四面懸崖峭壁外有墩臺以護水道又南渡江入交趾界滇紀縣南有霧露站菁由此抵柏木蘆寨又有蒲喇寨去交趾北蘭州僅五里鷄街寨在縣西北道出府城此爲要口

元江直隸州

玉臺山 在州城東舊名羅槃山共二十五峯懸崖絕壁險峻難登蒼翠如玉望之若臺又有大馬山在州治旁秀如筆峯對峙學宮前 自樂山在州東北十里狀如中原之崆峒今名栖霞山志云山與蒙樂山同脉故名
路通山 州東二十五里舊名馬龍山北瞰禮社江高峯千仞一綫羊腸通臨安路 嵯峨山在城西南二十里中峯嵯峨狀如卓旗飛舞翔動 寶山在州西二十里狀如螺髻尖若挿簪相傳昔有蠻藏寶山麓因名

因遠山 府西四十里有因遠驛爲往來必經之地泉出岩中流爲仲夷溪分溉田畝東流入禮社江志云州北有奇山曰龍瓜山有萬春泉仙人洞奇絕萬狀又有九竜山在州西北三百里產礦名鳧魚場

禮社江 一名元江自新化流入境遶州城東南而入臨安府界 崑峨河在城西四十里阿南村跨有混龍橋其下流入禮社江

關力白衣甸 志云在州南境元至元二十七年雲南關力白衣甸酋長凡十一甸內附蓋皆在州境云 魚復砦在州

西近鎮沅州界嘉靖三十年鎮沅知府刀仁攻那鑿克魚復寨是也

新平縣

鎮元山 縣南三十里又南二十里曰金營山 南峒山在縣南二百里南峒巡司置于此山有七十二崗名勝不一又倚樓山在縣西百里崇岩峻石若樓閣然

平甸河 在縣東十里衆流所匯又東五十里有大買河水勢洶湧 洪水泉在縣治西流灌郊郭爲利甚溥又西里許有端木井源出端木下味甘冽

迤隔山 在縣治東山勢來自昆陽連屬不絕 撒崇山在縣治北五十里林木翳鬱岩石峻險延長一百五十里路險人迹罕至下有溫泉又確閣山在縣北百里五峯聳峙有泉下注于摩沙勒江

馬龍山 縣西五里舊名馬籠蠻酋結寨其上因名馬籠部又北有硿崆山硿崆山之北又有諸龍山皆蠻酋結寨處也摩沙勒江 在縣東南八十里即馬龍江之異名也自楚雄府流經此又東南經元江境為禮社江元史謂之鹿滄江秋潦有瘴氣志云馬龍江在山之右迤南合鐵赤河東南流入

廣西界

鐵赤河 縣西四十里自臨安流入過瓦渡雙龍溪至縣西南又過興甯溪下流入于盤江 興甯溪在縣東二里繞治西南流入于鐵赤河

天生橋 有二一在縣北五十里一在東北十二里皆石梁可渡不假人力因名有韋泥巡司及和摩驛

鎮沅直隸州

案板山 在治北高百餘仞形如几案元以此名塞 烏連山在府東北山高林茂羣鳥彙集因名又治東有石山以噴

峴少土而名

波弄山 在治西山勢起伏形如波浪山之上下有鹽井六所土人掘地爲坑深三尺許納薪其中焚之俟成灰取井中之澆澆灰上明日皆化爲鹽鹽色黑白相雜而味苦俗呼爲白雞糞鹽用以交易

杉木江 在治南源出者樂甸流經境下流入威遠界合于谷寶江江岸多杉木因名

者章硬寨 在治西南正統五年麓川叛酋思任發屯孟羅大掠據者章硬寨沐昂進兵克之

者達寨 在治境又有赤石崖等寨滇程記永樂初攻石崖者達寨外夷整線來降又有祿谷等三十三寨亦近州境
馬容山 祿谷司北八十里高千餘丈盤亘數百里石路隘狹僅容一馬又右羅山在司南百里
納羅山 司西百里山深險中多虎豹土人呼藏爲納虎爲羅南浪江出于此

南浪江 在司南流出納羅山下流經司治南又西南流合于杉木江 馬湧江在司東源出臨安府納樓茶甸長官司流入司境又西南合于南浪江

恩樂縣

者島山 在治北島訛為樂因曰者樂山高聳可以望遠為北面之障

蒙樂山 縣東北二百里一名无量山巍然高峻窮日之力方至其巔有毒泉人畜飲之即死山與景東廳接界

景來河 在縣東自景東流經縣境下流入烏龍江以自景東來因名

曲靖府南甯縣

勝峯山 在今府城之西嶙峋聳拔高出羣峯志云山脉來

白金馬為羣山之長舊時名為妙高山洪武初潁川侯西平侯與元平章達里麻戰勝之因改今名又有負金山在今府南十五里 真峯山在府西南二十里山巒秀麗下有彌陀岩山後又有普賢洞又蓮花山在府東南二十里與勝峯山相對峙

石堡山 在府東北二十里一名分秦山相傳諸葛武侯南征時與諸酋長會盟處下有溫泉濶二丈許其沸如湯或曰即東山河之源也又青龍山在府東二十里山色蒼翠俗名明目山又有觀音洞在府南二十里寬平可容百人

湯池山 在府東南洪武十五年南征越州未下沐英駐兵于此降者甚衆又有紫溪山亦在今府之東南志云初越州曾阿資降旣而復叛據龍窩爲巢穴洪武二十六年沐春討之進至紫溪山大敗其黨直抵龍窩擒之是也又有華龍山亦在今府北二十餘里

白石江 在府北八里源自馬龍州界流經此東南合于瀟湘江洪武十四年沐英征雲南故元將達里麻擁兵屯曲靖英倍道而進未至白石江忽大霧四塞衝霧前行霧霽則兩軍相望矣達里麻大驚亟湧兵陳水上英別遣一兵泝流前

渡出其陳後鳴鼓角樹旗幟爲疑兵山谷間彼軍亂我師遂濟使善泅者斬其軍師畢濟整列而鼓喊聲震天英從鐵騎擣其中堅生擒達里麻俘斬无算遂入曲靖今有白石江橋跨于其上

瀟湘江 在城南源出馬龍州木蓉箐山流經此秋水時至有若洞庭瀟湘之勢因名其下流入于東山河 東山河在府東南亦謂之南盤江卽瀟湘白石所匯流也志云河旁有洲可百餘頃平坦肥沃旱澇無虞南流入陸涼州境東海子 在城東五里廣有二十里夏秋之交雨水汪洋稱

為巨浸又東二十餘里有黑龍潭旁有石洞其上怪石巉巖
林木茂密潭水泓深資以灌溉又龍泉在府西南十里泉分
二派灌溉甚多

矣層山 在亦佐廢縣西山有清泉居人皆汲飲而甘美夷
語水為矣又治東有旱感山歲旱禱之必應土人亦曰旱改
山云

塊繹江 縣南十五里發源白水驛南流達于羅平州境又
有小黃河在縣治旁四時色黃因名

霑益州

伯蒙山 在城東二十里高出眾山之上 龍華山在城北
二十五里有龍華古刹 梨山在城北八十里林木蒼蔚遠
望蒼然 北山在城東北五里上有古寺一名象山 花山
洞在城北一百里為交河源 沙河在城東五里南流會交
河 交河城東十五里自花山洞發源經州東北會臘溪水
南流入瀟湘江

宣威州

石龍山 州東七里西麓有石蜿蜒如龍志云土官營柵據
山為險又炎方山在州南六十里山下有炎方驛伯蒙山在

州東南約百里高出諸山之上

堆湧山 州東南二百餘里延迴二百餘里峰巒拒突如湧

出然 東山在州南二百里山高聳而色蒼翠亦名曲靖東山云

盤江 在州北一百二十里即可渡河也自昭通府流經貴州畢節衛南入州境又東南經貴州安南衛界志云州據南北二盤江之間其南盤江即府境之東山河流經州西南界而入陸涼州界

交河 州南百七十里志云南盤江與螭溪之水合流于此

故名又十里為交水壩其地為平蠻鄉與塊部水合交水稅課使置于此天啟二年官兵討霑益叛賊自交水進為賊所敗又有車翁江在州西北二十里流下合北盤江

陸涼州

邱雄山 在今州東一里其上有方池水無盈縮分醜山椒凡十八道又謂之十八泉 木容山在今州之西址二十里峯巒林木蒼翠可愛又有滿戍山亦在今州北二十里高出羣山林木茂鬱可稱絕勝

剖封山 州西四十里山高聳多花木芳華縣之名山首此

相近有石門平疇沃壤石笋森密周匝十里餘大者高數仞
參差不齊望之如笋東西行者穿其中故名石門又東出數
百步有離石狀如西岳三峯云

中延澤 在北雄山下卽南盤江也自府東合瀟湘諸水至
是會而爲澤州境十八泉與南澗諸水皆注之志云南澗在
州西北東南注于中延澤

木容關 在今州西十里又州北二十里有石嘴關又有天
生關在今州南九十里皆自昔設險處

蕎甸 在今州西南其地與澂江雲南二府相接山川回曲
道路環通奸宄竄聚于此萬歷三年撫臣鄒應龍征蕎甸等
夷平之立營戍守于是雲南曲靖澂江臨安與廣西廣南六
郡乃安尋復叛四十一年攻宜良官兵拒却之四十八年又
四出剽掠撫臣沈儆玠招降之設古甸龍崗營戍守其地尋
又奏設蕎甸守備治之天啟二年改爲游擊蓋防禦之要地
也

馬龍州

伯刻山 在州之南六十里有奇其相連者曰多羅山峯巒
峻峭怪石巉岩爲一州之望云

木蓉菁山 在州東南六十里下有木蓉溪流注于府之南境為瀟湘江 楊唐山在州西七十五里一名關索嶺上有夷關

中和山 近志云在州西南四十五里其山發自宜良蜿蜒起伏至此結為一峯前後窅兀左右有層嶂環列曲澗迴繞又有仙人洞五龍潭諸勝上下平田廣可千頃雲南前衛屯兵數百家居焉

磨盤山 在州西北天啟五年烏撒土酋安效良再叛犯馬龍州官兵敗之又追敗之于磨盤山賊自尋甸遁去又羅狩

侯山在州西北境唐永徽二年白水蠻寇邊郎州道行軍總管趙孝祖伐之敗于羅狩川侯山即此

東河 在州治東治西又有西河東流合于東河入尋甸界靈泉在州西南二里水色青碧引流灌溉居民賴之

羅平州

五臺山 在州南五里又南十五里曰鍾山又南十里曰樓閣山 白蠟山在州西南十三里又羅惹山在州東南六十里皆材木之藪也

祿南山 在州北八十里志云山高二百餘丈盤旋百里林

木葱蒨峭石巉巖州西八十里又有八部山與祿布相近岡巒八面聳列巒因呼爲八部云

盤江 在今州之東南九十里自廣西州之師宗流入界下流入于貴州之永甯州境志云州西南二百里有大渡河又有矣則江在今州之東南五十里俱流入于盤江 喜舊溪在州西其源出于州西南之龍甸村環流州境下流入于盤江又有太乙湖在今州北一里

平彝縣

巒岡山 在縣東八里山高聳雄視萬山又楊威嶺在縣西

五里又西五里曰定南嶺明初西平侯嘗提兵駐此今壁壘故址猶存 清溪洞在西三里洞內石笋林立外則溪流環遶又有桂花洞在衛北一十里

十里河 在縣西南三里會清溪河入羅平州界注于盤江 豫順關 在縣北二里又有宣威關在衛北十五里皆設險處也 古城巖舊在衛西定南嶺明建文初因險築城後以山風高烈徙于桂花洞

宣威嶺 城東十五里滇黔交界有亭曰萬里亭明景泰中巡按洪弼立坊其上曰滇南勝境

尋甸州

月孤山 在今州之東北八里綿亘五十餘里山頂有雲氣
卽雨一名鳳梧山鳳梧所之名蓋本此 勇堯山志云在州
城西峰巒峭拔林壑高深夏月恆有積雪俗呼雪山下有泉
流爲儻俸溪其西里許曰隱毒山地多嵐瘴惟此開朗土人
每歲夏月避居其上下有隱毒泉

果馬山 在今治西之六十里其下有泉流爲果馬溪其派
別流入于昆明縣注于滇池一名龍巨江 三稜山在治西
南六十里與嵩明州廢邵甸縣接界上有九十九泉其水流

入昆明縣卽盤龍江之上流又南有山巖產石蜜志云通滇
中逕路也其相近又有鳳凰麒麟二山云

梁王山 在今治南之七十里其界與雲南府之嵩明州相
接其相近者又有海岳山旁有洗納龍岩

龍頭山 在州東四十餘里下有二溪水合爲一河流入東
川府界又怒勒峯在府東五十里有一水蓄魚甚多上列六
寨曰沙必卽曰折墻曰則于曰按羊曰怒勒曰納逼皆盜藪
與宣威州接界

額吾峯 州南五十里上有清水塘亦有塞五曰額吾曰竹

圭曰東那曰沙黑曰額峯有溫泉二曰泓俗呼熱水塘又有濕泉橋長五十丈闊二丈跨阿交合水上 那多峯在峯北有大石塞接東川府界亦盜藪也

龍洞 在城北五里洞有流泉田疇賴之流于螳螂川志云府西南四里有仙人洞深二十里許其下又有水洞雲又三龍泉在城西十里周廻石如砌就其泉穿山而出面對一洞可容千人地名法果山

阿交合溪 州東十五里舊名些邱溢派江其源有二一自嵩明州一自馬龍州流至此又合流過宣威州界或曰卽交

河上源也跨溪有橋曰通靖橋爲四達之地在州東之二十里

車湖 在州西三十里一名清水海子周廣十四里四面皆山有灌溉之利焉又府西四十里有三龍泉居民亦因之以溉田 又有冷水塘在城北四里一名矣部烏泉流入于州東北之沙林甸云

儻倅溪 在廢歸厚縣旁源出湧堯山流經此有九灣遶城而流又磨浪水在廢爲美縣西其北五里曰螳螂河源出龍洞磨浪水流合焉又東南流經州東南三十里入阿交溪爲

三岔河河旁有排額洞頗幽深

澂江府河陽縣

金蓮山 在城東三里一名繡毬山又名龜山高圓平正衆

山環拱夕陽晚照燦若金蓮昔之府治學校皆建其上

闕摩山 在城東五里山多崖穴玲瓏幽秀有華藏寺

南峯山 在城西南二十五里山勢磅礴羣峯列峙迥出諸

山之表其右臂山如魚躍名躍鯉山

玉筍山 在城西南三十里舊名涌拔山孤峯竄秀狀若玉

筍左為誥軸山碧峯排列如展誥然

羅藏山 在城西北十里高五百餘丈疊巘重岡五峯屏列

陟其巔數百里山川瞭然在目元末梁王瓦爾密走羅藏山

立砦以守即此故又名梁王山

舞鳳山 在城北一里自羅藏中支透迤而來形如鳳首覽

輝左右支壠環抱勢同展翼明隆慶間知府徐可久於其麓

遷建府治郡之鎮山也

玗札山 在城北二十里自寶鼎山透迤起伏勢如羣馬奔

騰山峽有泉四出會為大溪

松嶺 在舊陽宗縣東二里舊有羣松鬱翠天風振颯如奏

笙簧

金雞巖 在城東五里華藏寺右壁形似雞舊傳每有鳴聲米價騰湧鄉人惡之擊去其首

鐵池河 在城東三十里自陸涼宜良流至路南鐵池鋪因以名河受撫仙湖水流入甯州

大衝河 在城東北舊陽宗縣南五里滙溪澗諸水下流入於明湖

隴邱衝河 在舊縣西北十二里發源隴邱衝流入明湖撫仙湖 在城南十里一名羅伽湖周三百餘里東南屬甯

州西屬江川西南受星雲湖水汪洋澄澈洩入鐵池河

明湖 在舊陽宗縣北一里一名逸休湖周七十餘里水色深碧境內溪河泉澗諸水滙此下流由湯池東繞宜良入鐵池河 東谷溪在城東六里水出東谷之麓繞舊治南入撫仙湖土人以此卜歲消則豐長即歉

冷然泉 在城東闕摩山之阿味甘冽又金雞巖下有玉冽泉味甘色瑩

西礮泉 在城西七里一名西浦雙泉竝出左清而右濁合流納諸山溪注撫仙湖

濯纓泉 在城東北舊縣西一里夾浦山麓自石罅噴出上有龍洞

江川縣

海瀛山 在城東十五里一名孤山特起撫仙湖中四壁如削

蟠坤山 在城東南十里頂有石洞鄉民禱雨焉

龍鳳山 在城西三里崇岡疊阜為邑鎮山

綠龍山 在城西北二十里林木蒼翠下有阿化泉六部溪

屈穎頰山 在城北十五里一名疊翠山上有泉三派分流

西入滇池東入撫仙湖南入星雲湖

萬松山 在城東北三十里襟帶湖山邑中名勝

關索嶺 在城北二十五里臨安孔道舊有土巡檢防守千峯聳屹一徑盤紆與府城西北關嶺相距百里岡脊連亘同稱要隘

下河 在城西十里分中河之流經舊城南入星雲湖

中河 在城西十里源出阿花冲南入星雲湖

上河 在城北十五里源出關索嶺南入星雲湖

星雲湖 在城南十里周八十餘里東由海門小河入撫仙

湖兩湖相通中有界魚石星雲之大頭魚撫仙之窟竇魚兩不相越

阿件溪 在城西北卽阿花冲源出屈類巔山之南流入星雲湖

白龍潭 在城北十里中有巨石一人搖之則動衆人搖則不動

新興州

連珠山 在城東五里一名五星山五峯絡繹左右映帶

東山 在城南二十四里玉湖之東形如半壁其坳有龍泉

大棋山 在城西北十五里奇梨山之南中平如掌有若棋枰

奇梨山 在城西北十七里林木茂蔚下有泉湧爲九龍池

蒙習山 在城北七十里劈分三脈爲臨開各郡之祖山其頂與晉甯州分界

羅麼山 在城東北二十五里一名龍馬山下有白龍潭流而成溪

石巖山 在城東北二十六里與龍馬山相連山左有白龍泉流爲九曲入於玉溪其山巉巖嶙峋上有石洞石峯

檀木嶺 在城西三十里嶺甚峻舊多檀木下有清水河流入大溪

密羅河 在城西南三十里源出密羅山流入大溪

大溪河 在城西北五里一名玉溪河受諸溪之水入曲江資以灌溉

羅木箐河 在城東北二十里可溉田

玉湖 在城南舊研和縣之西南二里塗潦既盡鏡水浮空佳景也

九龍池 在城西北二十里又北十里有蓮花池下流俱入

於大溪

路南州

鹿阜山 在城內一名鹿母山

遮日山 在城東南十五里山勢峭拔夕陽掩映一名此赤山

紫玉山 在城南里許州治之向山也橫亘數里環拱作案

香花山 在城南二十五里多黑石極光潤

竹子山 在城西南二十里山高于仞周百餘里有蠟燭香爐諸峯環繞拱向

石林 在城東三十五里怪石陰森嵌結玲瓏下有伏流深遠莫測昔人冬夜見石上有李一株結實鮮紅次早尋之不復見俗呼李子箒

芝雲洞 在城北二十里洞口石似芝與雲故名初入空廠可容百人再入四壁垂乳扣之有鐘鼓聲又石枰石牀石田奇怪不可名狀

巴盤江 在城東南郭外發源黑白龍潭屈曲盤旋流入盤江形類巴字故名又云濛山

鐵池河 在城西三十里自宜良流入州境下入甯州

興甯溪 在城東二里繞城西南會鐵池河流入盤江

休柔溪 在城東三十里源出休柔山南流入盤江

疊水 在城西南三十里巖高千仞瀑布飛流聲如霹靂

溫泉 在城西北五十里民和鄉其水温和有硫磺氣

廣南府寶甯縣

牌頭山 府西北五里峯巒起伏其石小山挺峙如盾土人築砦居之 蓮花山在府東北二十里五峯連竦諸峯參差旁峙形如蓮花

西洋江 府南八十里源出府東南境之板郎山速部山木

山三流相合東南入于廣西田州之左江

祛否山 在富州治西形如狡狴昔土人結屋避兵其上今呼獅頭砦

玉泉山 州西北七十里山頂有泉飛流如素練下有石池清碧回旋溢流于西洋江 者鷄山在州東南九十里高二百仞怪石嵯峩夷酋之壑穴也又西甯山在州東北百十里岩洞深邃蠻潛匿其中不可究詰

楠木溪 州東三十里源出州境之花架山其水常溫又南注溪在州治西源出州西北之麻卯山流至州南合楠木溪

東行至石洞伏流十五里復出下流入於粵江

開化府文山縣

獅子山 在城東八十里危巒突起山勢崢嶸

西華山 在城西南二里橫列三十六峯層巒疊翠與東文

山對峙拱翼府城

天洞山 在城西南一百五十里山有石洞瀑布懸流

鳳凰山 在城北五里形如飛鳳郡之鎮山也

霧露結山 在城東北二十里蒼翠插天雲霧濛結

最高峯 在城東北五十里峯巒矗起高數百丈土人每聽

猿聲以占陰晴

期烏石洞 在城西一百三十里安南里水從中出卽盤龍河之源也

濟熱河 在城東二百里東安里炎蒸酷熱居民浴水解毒賭呪河 在城南二百四十里與交趾接界蠻夷於此立誓各不相侵故名

魯部河 在城西南一百八十里下流入梨花江

盤龍河 在城西源出期烏石洞流至開化里爲儂人河又經城北東南三面澗澗環繞盤曲如龍故名

浴龍池 在城南二十里逢春里水一日三潮

綠水塘 在城東北二十里江那里水如碧玉可鑿毛髮

異龍潭 在城南十五里逢春里諸流多滙於此

東川府會澤縣

翠屏山 在城東南一里爲治主山層巒聳翠環峙如屏林木蒼蔚冬春積雪上有九龍靈泉山嶂如壁又名靈壁山玉獸山 在翠屏山東麓每歲豐則現獅象牛馬之形色白如玉近視則無

金鐘山 在城西南一里形如覆鐘登眺城池瞭若指掌

絳雲露山 在城西南二百里一名雲弄山與祿勸縣接界
石鼓山 在城西十里石峯纍疊有巨石如牛擊之有聲
納雄山 在城西五十里一名太乙山夜靜時輒聞人聲
雪山 在城西三百餘里法夏界奇峯峭壁積雪經年
車洪江 在城東一百二十里卽牛欄江下流過七星橋達
昭通入金沙江
壁谷江 在城西南一百三十里源出尋甸州滙果馬車湖
倘甸倉溪諸水合流爲江陡峻深狹土人結藤爲橋以通往
來

金沙江 在城西二百五十里自武定流入府境經昭通入
馬湖府

以濯河 在城西五十里源自待補西經府治過納雄山下
入金沙江

新河 有三在城北知府黃士傑羅得彥相繼開濬皆灌漑
民田

蔓海 在城北廣數百頃潄水於夏秋之間冬涸春乾積年
蘆葦蔓草朽於其中以丈六竹竿插之尙未至底出之仍無
纖土故名

渭齒化溪 在城西南百里源出雲弄山下流入金沙江

溫泉 在城西南三十五里水自石竇中出熱如沸湯清澈如鑒

縮泉 在城北五十里雲弄山腰人取之者有銅鐵器及人聲則收縮不流

龍潭 有三一在城東六十里南山下一在城西五里一在城西二百餘里為黑龍潭

犀牛潭 在城東南八十里者海周里許滙山溪水深不可測傳有犀牛出沒人或見之

昭通府恩安縣

寶山 在城東五里圓潔秀麗諸山環拱

雨公山 在城南十里背枕高峯面臨曠野擦拉利濟二河會流滌繞

龍洞山 在城北二十五里為府治主山蒼峯聳秀峭拔凌霄山下有洞如室如室石乳倒懸玲瓏變幻有泉水從中出遇旱禱雨於此

虎跳巖 在城西二十里山勢峻峭崛起狀如猛虎蹲踞為一郡之關鎖

犄角山 在大關西二里層巒聳翠頂多雲霧草木陰翳中有黑猿黃狢人面猴數種陸枝飲水天久雨聞啼聲即晴

梨山 在大關北百五十里竹樹蔽翳鳥道崎嶇行旅不見日色

飛瀑崖 大關東三十里石壁巉削高數十仞上有細泉隨風吹落飄灑如珠

大涼山 魯甸北九十里複嶺危峯人跡罕至

擦拉河 在城南二十里源出大黑山流為擦拉河南入府治會利濟河出虎跳巖歸撒魚河

利濟河 在城西二里又名荔枝河發源龍碕山繞府城入擦拉河

灑魚河 在城西四十里發源雄溪出馬鞍山後匯諸水過大關入橫江歸金沙江

八仙海 在城東二十里夏秋雨集瀾漫數十里中有怪石參差布列宛似八仙

老里渡河 大關五里發源利濟河經卜烏蒙歷鹽井渡入四川橫江產細鱗魚水有毒

橫水河 大關東北三十里

牛欄江 魯甸西八十里

金沙江 魯甸北一百五十五里來自東川流入永善

黑山河 魯甸南五十里流會擦拉河

鎮雄州

砮砮雄峯山 治南二百六十里山半有大黑石狀似麋鹿其上最涼夷語謂石曰砮謂麋曰砮涼曰雄故名

犀牛山 在城西南二百七十里山上有池

烏通山 在城北二里巍然獨峙高入雲端如人翹首獨立夷語謂首為烏立為通故名

野鬼山 在城東二百六十里土獠祀鬼於此

安樂山 在城東北二百六十里山有數峯路徑曲折達芒

部敘州

白水江 在城北二百三十里受八匡河卻佐溪黃水河勿食料溪諸水流入四川敘州府

托洛河 在城東五里源出烏通山麓經府治東南流入苴蚪河

苴蚪河 在城南三十里源出阿黑關合納冲河入七星關河

永善縣

獻寶山 在城西北十餘里迴環作案

太乙山 在城西北二百七十里上有九皇廟相傳灘中浮

來香杉木一塊上載石像九因建廟焉

九蓮峯 在城北五里縣治主山也九峯並峙宛如蓮瓣

金沙江 在城西四十里水勢奔騰環繞如帶

廣西直隸州

發果山 在州治北培塿相接環于州治城中有山曰鍾秀

城南二里曰翠屏皆與治相映帶

阿盧山 在治西二里山廻亘四十餘里南連彌勒北跨師

宗有山洞深邃莫窮洞中流泉入于西溪山下諸夷曰阿盧

部又有吉輸山在東南五里 臨光山在西十里與阿盧山

相接

巴盤江 在州西北百里一名瀋江亦作半江自澂江府流

入又東至師宗界而入曲靖府羅平州境又有盤江在治西

五十里自臨安府阿迷州流經彌勒界復東北流經州西至

師宗而合于巴盤江

西溪 在州西志云師宗諸水多伏流于地至阿盧山洞始

出而爲溪流經城西環抱城南與東溪合下流入于矣邦池
矣邦池 在州西南一名龍甸海亦謂之乾海週三十餘里
半跨彌勒之界有二源一出阿盧山麓石竅一出彌勒吉雙
綿南流入盤江中有小山宏治十二年李韶言州南有乾海
復有平壤一帶有水利可開屯田是也

師宗縣

恩容山 治北五里三峯峭拔 鎖几門山在治北十二里
二峯高聳經行其間如門扁然志云西南七十里有龜山亦
高峻西去府城七十里爲夷獮之藪萬歷四十八年築土城

於此周一里有奇謂之督捕城府通判駐守其地

英武山 治東八十里峯巒峭拔高可千仞洪武中設英武
驛于縣山下饒盜賊及虎行人稀濶驛遂廢 緣德山在治
東百二十里孤峯秀削一名六德山有大經廢驛址在山下
地名阿互村多暴客

馬者籠山 治東二百四十里山高峻又州東三百里有高
來山高三百仞志云高來山西南三十里卽馬者籠山

巴盤江 在治西北五十里自州境流至此又東北入曲靖
府羅平州界又治西二十餘里有盤江亦自州境流入而合

于巴盤江志云近治有大河口蓋盤江經此廻曲而爲大河也

彌勒縣

卜龍山 治南五里舊部籠奇千戶所置于此疊嶂重巒環
遶州治又阿微山在西十里舊阿欲部千戶所治也岡巒重
疊下有溫泉其山綿亘七十餘里東接北傾山 北傾山在
北三十里阿欲鄉中高五千餘仞中連阿欲構甸二山
盤江山 治東南百里有東西兩山對峙盤江流其中東抵
師宗縣南抵阿迷州中有石竅深廣丈餘濁水湧出注于盤

江

盤江 在治東南自臨安府阿迷州流入境又東北入州界
八甸溪 在治北其源有二一出舊村一出阿欲山一出北
傾山至治東而合流南入盤江或謂之巴甸江治前有橋曰
玉津橋跨溪上長五丈闊七尺

十八寨 在治西南有十八寨山山箐連屬其中夷種最繁
蓋盜藪也砦東五里有白馬河 新哨在治西南自阿迷州
之彭堡達于新哨乃至縣治又北出板橋接雲南府宜良縣
界

曲部山 在維摩西中峰高竦下有泉流爲溪經州南數里入于石竇今州下有曲部驛 萬年龍山在東北百里有泉流入廣南府界又寶甯山下亦有泉流入于寶甯溪
小維摩山 維摩東北八十里高可千仞又有大維摩山在東南二百里高出衆山之上昔時土官皆居此 阿母山在東南九十里高千餘仞下有阿母驛又東七十里爲維摩驛又折角山在東南一百五十里下有泉流爲折角溪 龍定山在東南三百餘里有五峰兀立
寶甯溪 在東北一百二十里出寶甯山南流合萬年龍溪

及折角溪之水流入廣南府界滙于右江

明馮時可滇行紀略

三月十七日至蘭谿邑令劉宇烈來會余問蜀道渠言古棧道如坦塗鳥聲泉聲花香草香甚可娛人何愁攀援三峽差險然當一三四月七八九月皆安流惟多集長年以人力勝水力則馮夷陽侯何必爲梗

廿八日至豫章憲副任時芳來訪言由滇入蜀道甚便從瀘州至內江僅二百里中有玉蟾寺天下絕境嘉定凌雲亦復不惡公足跡遍天下然未涉蜀道如讀佛經未嘗閱華嚴何

能盡佛道

廿九日少司馬衛淇竹至舟言蜀道之難生平往來仕途入經三峽熟悉險阻蜀船取輕不能多載其板甚薄須齊力急濟縱有險處一鼓已過陽侯無能爲也然五月以後誰敢犯峽

四月初十日抵安莊州守萬象請觀雙明洞去城可二里其巖石高數十丈如奇雲怪虬相垂相角洞中如殿閣仰望杳然左右兩巖若雙闕然故名雙明各有飛梁展轉相通水自巖底流出清瀾綠波大有勝致台蕩間巖洞不能過也

十一日發安莊過疊水巖水從兩崖間下闊十餘丈上若白練空懸下若白雲倒飛其聲殷殷如雷上下皆有清潭碧玉黛綠相映宇內瀑布以此爲第一次則廬山三疊

十六日游碧雲洞石乳若蓮花倒垂折而右稍晦命人扶曳而進忽見天窗陽光迸射諸態互呈洞高數仞內起三峰下有獅象龍蛇最爲逼真仙佛胡人則影肖耳此洞甲于黔中雙明華蓋猶當遜武

曲靖亦要地然方滇中諸郡獨貧以有市場人烟不至蕭瑟士女亦稱妍冶

廿二日行百里至滇省山川開遠土地廣平城郭壯麗街衢
整潔士女粧束言語皆如金陵其氣候不寒不煖裘葛可無
備惟風最多皆西南風舊志兩師好黔風伯好滇

滇地雖平實高於黔日晷亦與中原不同日減二三刻夜增
二三刻四季如春日炙如初夏稍陰如早秋一雨遂如深秋
夜卧必擁綿各郡皆然惟永昌臨安夏間差熱耳無日無風
季尤顛狂凡風皆西南若東南風卽媒雨

午日觀溫泉出門可十餘里其泉在平地用修謫居嘗浴于
此

碧玉泉相近有曹溪寺有泉甚清一日三潮以辰午酉三時
水必漲滿其餘半涸貴州省有泉一日五十盈五十涸人稱
聖泉安甯城北有虎邱亦美勝用修未嘗至姑蘇虎邱時游
此以寄想

五月七日飯響水關至捨資驛一路皆高岡上下數十百折
箐林幽窈大有黔巫意八日行四十五里至石劍舖置頓又
四十里抵楚雄府是郡寄山麓望如村落城內民居不甚殷
富是日風甚大滇中無日無風故人面多黑
十日出門過金蟾寺上有九曲水頗具勝致

十四日過白崖石崖巖絕其色如雪上定西嶺最高峻有削壁懸空上鐫天柱二字然此可稱雲屏不足稱天柱也

城外石馬井水無異惠泉感通寺茶不下天池伏龍特此中人不善焙製耳徽州松蘿茶舊亦無聞偶虎邱有一僧往松蘿菴如虎邱法焙製遂見嗜于天下恨此泉不逢陸鴻漸此茶不逢虎邱僧也

滇中多風至大理風嘗寂寂蓋滇風當來自西此城正當點蒼西障風爲所扞耳獨雲氣無論陰晴常冒山頂晴則雲明雨則雲晦雲所不到翠色殊常

仲夏廿七日游崇聖寺出北門二里許寺前平遠下臨洱水古杉圍繞青蒼千霄中有三浮屠大者高三百餘丈其二差小諸別院甚多出門見前山環抱丹翠相錯大有勝致但以不得登蒼山巔爲歉巔高六十里上有白雲擁護白雪堆積行者恐迷且墜且無栖宿處有沈隱士曾一登言其勝甲寰區真神仙窟也

滇南最爲善地六月卽如深秋不用挾扇衣葛一也嚴冬雖雪滿山頭而寒不侵膚不用圍爐服裘二也地氣高爽無霉濕三也花木高大有十丈餘其茶花如碗大樹合抱難圍雞

足蒼松數十萬株雲氣如錦四也日月與星比別處倍大而更明五也花卉多異品六也望後至二十月猶圓滿七也冬日不短八也溫泉處處皆有九也岩洞深杳奇絕十也獨離家太遠家書萬金如異域然然居其地者必不捨此而他慕矣

國朝陳鼎雲南紀游

平彝縣本衛地明崇禎乙亥年始改縣設吏南渡兩石橋道傍有清溪洞深十餘里大抵洞者皆洪水趨洩之門戶其中勝景凡洞俱有皆碧乳融成石罅水氣所結如兩廣之神仙

閩中之玉華廬州之崔仙湖廣之梵陽與碧雲半相類出清溪後戶即紫泉洞亦幽深可愛遊者不倦過揚威哨皆如中原坦道兩山繁林木矣又多鸚鵡諸禽鳴聲上下頗傾客耳交水即新霑益州舊治去交水西北百十里往烏撒必由之道交水兩水相交平疇萬頃民物豐阜恍如江南風景

馬龍州有義象塚明天啟間水西安氏叛率眾犯州滇省戒嚴撫軍調陶士司禦之陶有一象日將暮伏山澗中鼻吸泥水數斛突出咆哮跳躍噴泥水直抵賊壘寇皆驚駭復捲一賊擲空墜死陶有牙將乘勝逐北遂獲大捷及曉收師象中

毒弩而斃土人德之葬于南山春秋祭掃至今不輟

小關索嶺上有武侯及索祠祠前銅馬一乃唐時物也古柏參天俱大數圍道傍有碑云武侯平蠻會盟於此按史亮盟南人於木密卽此也

易隆驛屬尋甸東坡有城卽木密所也今已傾圮去城十里許有溫泉可澡

大鼎山有海潮寺寺頗清幽多竹木面海子濶數十里週百餘里隔岸卽嵩明州去寺半里道傍有毒泉碣云此係毒水飲者傷生楊林屬嵩明州前朝所也今省入州出東關五十

五里卽楊升庵慎題詩處

板橋驛出西關三十五里歷鷓鴣哨度石梁而至歸化寺去滇城止十里矣登金馬山俯瞰城中煙火萬家樓閣參差雙目頓爽

會城內有三山五華其一也上有武侯祠明末孫可望建宮殿登極於上今則成瓦礫矣吳三桂邸在城西北隅今惟餘池沼園亭之址在焉

螺峰在城東北隅倚山建圓通寺頗多亭榭名人題句甚多俱刻巖石松楸頗盛四時綠陰交覆白雲瀾漫差足遊覽夏

桂洲有五言律一首鐫崖石上其辭曰古寺翠崖陰危亭絕頂臨鶴巢松有夢雲出岫無心仄徑攀蘿上叢臺刻竹吟南天秋日暝哀響合猿音正德十三年秋七月五日廣信夏言題但未考桂洲何事至滇也

城南四十里卽太華山高峻凌虛城西卽碧鷄山相傳漢時有鳳儀此王褒持節來祀城北蛇山直出雲表如列屏翰

金馬碧鷄坊在南關外乃百貨滙聚人烟輳集之所富庶有江浙風

東郭有金牛寺寺外八角亭中有銅牛一重數萬斤以鎮水

怪蓋此地緣溪每春夏淫雨東北萬山之水奔流如駛往往衝圯民居故範牛以鎮明末孫賊僭號取牛鑄錢 國朝水發屢壞廬舍今已復鑄水患減矣

銅瓦寺在會城東十餘里金馬山西北麓範銅爲瓦覆寺三楹春月遊人畢集

昆明池方數百里跨雲南安甯晉甯三州郡水如倒流故曰滇水

安甯州有溫水甲於諸泉稱三絕第一無硫氣二則身有垢不假澣濯入水俱浮三有疥癬者一澡卽痊

大理府爲天竺之妙香國初屬羅刹相傳觀音大士從中印
土來登點蒼山巔踟躕信宿今盤陀石尚在化其地結廬勒
券刻洱海石壁字跡宛然

蒼山峰頂有黑白二龍池雲霧晦冥羣龍千百出沒黑池尤
猛烈樵者不敢近木葉飛墜霹靂隨之

白崖在大理東南烟火萬家有高娘寺去彌渡三十里彌渡
亦大村落百貨俱集地暖沃壤數萬頃

點蒼山一名靈鷲梵語耆闍崛蒙氏封爲中岳漢書曰邪龍
其山如扶風太乙上有馮河周迴萬步五月積雪皓然卽此

山也有十九峰其高直上五十里登其巔復有大山高五十
里度嶺西行達永昌界山色蒼翠欲滴奇花異卉遍於巖谷
四時不謝早起開爽日出後卽雲霧覆之至七八月雲霧收
淨惟一白縷橫截山腰日夕皆然所謂玉帶鎖蒼山也其下
多文石三塔寺后產者乃佳餘皆白石而已地暖無冰霜溪
澗積雪厚數尺盛夏兒童碗盛賣之和以糖蜜可療饑渴
大理一名羊苴咩城狄青討儂智高史稱智高遺金龍衣而
遁不知其終於大理也

城內有兩司馬祠一祀司馬遷一祀司馬相如漢元封間遷

奉使西征南畧邛笮昆明相如持節開越雋故皆立祠祀之
隋南蠻叛史萬歲破之追近大和見諸葛武侯紀功碑銘其
背曰萬歲之后勝吾者過之萬歲踏其碑碑跌誌曰史萬歲
不得仆吾碑遂爲復立今在高娘寺史公亦有遺像明萬歷
間鄒應龍撫滇平鐵索箐赤石崖羣盜今有戴德祠此葉榆
四遺愛也

感通寺在郡南十里點蒼之麓又名蕩山寺峰巒環遶林壑
幽深楊升庵寓寺小閣題曰寫韻樓四壁皆升庵墨妙升庵
往來大理永昌間近四十年訪於舊家得白古通玄峰年運

志其書藝文升庵孰諳其語譯爲滇載記南詔始末方得詳
備登寫韻樓雞足雪山橫亘煙雲之表明末滇詩人唐大來
雍染號擔當和尚亦寓此樓壽九十餘樓前白茶花高數十
丈大數十圍花如玉蘭心殷紅滇南只此一樹埋條分種皆
不活也

崇聖寺又名三塔寺在郡北五里三塔矗峙隔洱海百餘里
輒望見中塔正方磚石甃成高四十八丈十六級絕頂四角
範四金鵝高二丈塔下遊人以巨石投地金鵝昂首長鳴音
響清越黔國公楷書山海大觀四字文石鑿成一字縱橫四

丈四石列塔前如屏銅鐘重十萬斤南詔建極十三年造乃唐咸通年也大雄殿巨麗精巧覆以琉璃瓦墁地並徑丈點蒼石甬道傍紫荊樹亦高數丈唐朝老梅狀若古松亭亭直上枝幹如檜栢大士像乃天雨銅汁所鑄高二十四尺

宏聖寺在郡西二里舊名王舍寺浮屠三十丈十六級阿育王建寺前有楊升庵摹刻禹碑蒼山向有五百寺俱阿育王建今尚存六十餘處城內大慈大悲文殊普賢藥師興福而普甯最大爲祝聖所玉局峰下以唐御史杜光庭爲伽藍光庭自號青城居士灌縣人教授大理龍泉峰下有祭天臺相

傳諸葛武侯征南在蒼洱駐兵數月見玉局峰下鳳凰一雙飛鳴而過公遍歷榛莽得峭壁石龕三皇五帝像乃建閣奉像其中而祀之又於石上鑿八卦今尚存焉

無爲寺在蘭峰半巉巖峭壁行茂林數里西山豁然中開從絕磴左折入寺有石樓寬三十丈摠衣登之洱海雪山近在几席有香杪五株大百圍高八九十丈太古時物也昔有二十餘樹喪亂時代盡此僅存者

芒湧溪在郡北二十五里昔有三十八庵巖壑幽秀天風海濤時震林木蒼山中巖號雪山有盤石徑丈爲釋迦苦行地

草石皆作梅檀香亦名香石巖傍有鳳眼洞有天生木橋其木半月一換四季長新人跡罕到惟樵徑耳與畢鉢羅窟皆大理古跡然天生木橋神力半月一換永昌鶴麗皆有之不止此靈鷲剎剎相望蓋在天竺幅員之內爲阿育王故封曾建八萬四千塔大理塔基數百皆其舊址唐乾德二年詔沙門三百人入天竺求舍利及梵書至開寶九年始歸其記錄行程曰巍峰曰鷄足山曰優波掬多石室曰王舍城曰鷲峰曰阿難半身舍利塔曰畢鉢羅窟以今考之皆大理也蓋當日由西番行入天竺而復東行以達大理者緣南詔爲蒙氏

地而黔蜀之道不通也白古通載釋迦於靈鷲山說法華經其說相合又釋迦死時迦葉尊者在耆闍崛山後入雞足雞足與靈鷲相望而畢鉢羅窟舍利塔見存與通紀西陽雜俎吳船錄舊唐書俱同一轍然則世之所謂佛國者卽在滇南矣

大理西門外教場每年三月十四十五十六三日爲大街子百貨俱集結茹如闐闐文武官吏共出彈壓唐宋元明相沿不廢小街子逢二五八日聚於各市午過則散

大理有風花雪月四景上關花下關風蒼山雪洱海月今花

已無種風則處處有之下關稍甚自九月起至次年五月無日不排山倒嶽破房揭瓦聲如雷吼惟黎明少息辰刻復起室內燃燈八窗洞開燈影不搖也過下關橋必下蓋整冠否則飛颺而去

下關南望萬山壁立一水中通其曲折處卽風穴故雖晴和之日此處仍然大風不息語云兩師好黔風伯好滇豈風雨真有所好哉

雲南縣古名洱海縣南二十五里爲水目山水目梵刹容衆千餘

定西嶺在白崖西北高數千仞至巔則坦如有水可種桑麻百萬頃也四十里至趙州由湖南辰沅以西皆自下而上至鎮遠趨貴陽俱上大山斗峻險絕之坡指不勝屈皆上峻而下坦至定西而盡其地高中州千有餘里去天尺五黑夜星光照耀如晝天如覆釜伸手可捫星辰身雖履地自覺憑虛至永昌騰越更入霄漢矣

洱海朝東風暮西風四季不爽故舟航來去皆張帆而行不假篙櫓至八月望夜海中出珊瑚樹高數丈漁者盡見冬日大風海水倒卓起火光如山

沅江武定之間有魯魁山方千里民皆蓄髮劫掠流毒官兵不能制地險絕鴻荒以來未見天日過此則銀場在焉富甲於江浙

文殊寺方丈而東雞足當前如列翠屏雞足之東玉峰出天半此麗江小雪山也登小雪山卽望見大雪山

雞足山在賓川州泛洱海四十里乘風而渡兩日到山三峰偃伏如雞距頂有石門佛大弟子摩訶迦葉秉釋迦衣鉢入定於此候慈氏佛下生乃入涅槃逢歲朔四方緇素進香自漢迄今不絕大刹七十二所蘭若三百六十小庵無算傳衣

羅漢迦葉寂光放光五大寺最著每寺千衆或數百衆不等皆刀耕火種爲食僧多卷毛鈎鼻深目卽曩在五臺京師及江浙閩粵所見乞食羅漢頗知漢語迦葉殿在雞足之半無三十年不火

廣西府近安南有莫洽峰高萬仞終歲雲霧不開在師宗彌勒之境惟三月三日起至四月三日止一月皎潔遊人登其巔望見安南宮室山中多金銀礦故民物富雖十廣南府不及也

楚雄姚安開化三郡雖相間甚遙而風土則相近然肥瘠各

異故貧富不類山川亦有奇異可紀者洞壑亦有絕勝可遊者山若凌華欺岱眇岳天鐘黃雲紫絲皆秀色可餐川若丹池墨海雲溪波塘荷澤菱溪皆可濯纓濯足而五邑三州之諸生皆恂恂儒雅敬慕中國余曾遍遊三郡邑車馬之資飲食之供皆各諸生傳奉諸生之家即余遊客之郵舍也別時各有遺贈土儀之盛餽贐之豐多至百金者甚矣文教之重也誦詩讀書之人皆知敬其類而文物之邦其能若是也耶

明徐宏祖麗江日記

崇禎己卯正月予由雞足山赴麗江土府木公生白之招于

二十六日抵麗江寓通事禾姓之小樓晨飯後通事父言木公聞余至甚喜即命以明晨往解脫林候見諭諸從者備七日糧以從蓋將為七日款也

二十七日微雨坐通事小樓追錄前記其地杏花始殘桃猶

初放蓋愈北而寒也

二十八日通事言木公命駕下午向解脫林

解脫林在北塢西山之半蓋雪

山南下之支本郡諸刹之冠也

二十九日晨起具飯甚早通事備馬候往解脫林始過西橋

由郡署前北上挾黃峯東麓而北由北塢而行五里東瞻象

眠山始與玉河上流別又五里過一枯澗石橋西瞻中海柳岸潑波有大聚落臨其上是為十和院其後即十和山自雪山南下之脈也又北十里有大道北去者為白沙院路西北度橋者為解脫林路橋下澗頗深而無滴瀝既度橋循西山而行五里為崖腳院其處居廬交集屋角俱插小雙旗乃把事之家也院北半里有澗自西山峽中下有木梁跨其上度橋西北陟嶺為中甸大道由橋南溯溪西上嶺者即解脫林道乃由橋南西向躡嶺嶺甚峻二里稍夷折入南峽半里則寺倚西山上其門東向前分一支為案即解脫林也寺南岡上有別墅一區近

附寺後木公憩止其間通事引余至其門有大把事二人來

揖俱姓和一王文嘗入都上疏曾見陳芝臺者一主武其體幹甚長壯而面黑真猛士也介余入木公

出二門迎入其內室交揖而致殷勤焉布席地平板上主人

坐在平板下此中極重禮也敘談久之茶三易余乃起送出

外廳事門令通事引入解脫林寓藏經閣之右廂寺僧之住

持者為滇人頗能體主人意款客焉

二月初一日木公命大把事以家集黑香白鏹十來餽下午

設宴解脫林東堂下藉以松毛以楚雄諸生許姓者陪宴仍

侑以盃緞銀盃二兩綠縐紗一疋有餚八十品羅列甚遙不能辨其孰

為異味也抵暮乃散

初二日入其所棲林南淨室相迎設座如前既別仍還解脫林昨陪宴許君來以白鏹易所侑綠縐紗去下午又命大把事來求作其雲蕙淡墨序

初三日余以序稿送進復令大把事來謝所饋酒果有白葡

萄龍眼荔枝諸貴品酥餅油線

細若髮絲中纏松子肉為片甚鬆脆髮糖白糖為絲

細過於髮千條萬縷合揉為一以細麵拌之合而不膩諸奇點

初四日有雞足僧以省中錄就雲蕙淡墨繳納木公木公即令大把事傳示求為較政其所書洪武體雖甚整而訛字極

多既舛落無序而重疊顛倒者亦甚余畧為標正且言是書宜分門編類庶無錯出之病晚乃以其書繳入

初五日復令大把事來致謝言明日有祭丁之舉不得留此盤桓特令大把事一人聽候求再停數日煩將淡墨分門標類如余前所言余從之以書入謝且求往中甸觀所鑄三文六銅像既午木公去以書答余言中甸皆古宗路多盜不可行蓋大把事從中沮之恐覘其境也是日傳致油酥麩餅甚巨而多一日不能盡一枚也

初六日余留解脫林校書木公雖去猶時遣人餽酒果有生

雞大如鷲通體皆油色黃而體圓蓋肥之極也余愛之命顧僕馭爲臘雞 解脫林倚白沙塢西界之山其山乃雪山之南十和後山之北連擁與東界翠屏象眠諸山夾白沙爲黃峯後塢者也寺當山半東向以翠屏爲案乃麗江之首刹卽玉龍寺之在雪山者不及也寺門與階級皆極整而中殿不宏佛像亦不高巨大然崇飾莊嚴壁宇倩潔皆他處所無正殿之後層臺高拱上建法雲閣八角層甍極其宏麗內置萬歷時所賜藏經焉閣前有兩廡余寓南廡中兩廡之外南有圓殿以茅爲頂而中實磚盤佛像乃白石刻成者甚古而精緻

中止一像而無旁列甚得清淨之意其前卽齋堂香積也北亦有圓閣一座而上啟層窗閣前有樓三楹雕窗文榻俱飾以金碧乃木公燕憩之處扁而不開其前卽設宴之所也其淨室在寺右上坡門亦東向有堂三重皆不甚宏敞四面環垣僅及肩然喬松連幄頗饒烟霞之氣聞由此而上有拱壽臺獅子崖以迫於校讐俱不及登

初六初七日連校類分標分其門爲八以大把事候久余心不安乃連宵篝燈丙夜始寢是晚旣畢仍作書付大把事言校讐已完聞有古岡之勝不識導使一遊否古岡者一名獮

羅在郡東北十餘日程其山有數洞中透內貯四池池水各
占一色皆澄澈異常自生光彩池上有三峯中峙獨凝雪瑩
白此間雪山所不及也木公屢欲一至其地諸大把事言不
可至力尼之數年乃得至圖其形以歸今在解脫林後軒之
壁北與法雲閣相對余按圖知之且詢之主僧純一言其處
真修者甚多各住一洞能絕粒休糧其爲首者有神異手能
握石成粉足能頓坡成窪年甚少而前知木公未至時皆先
與諸土人言有貴人至土人愈信而敬之故余神往而思一
至也

初八日昧爽大把事齋冊書馳去余遲遲起飯而天雨霏霏
純一饋以古磁盃薄銅鼎併芽茶爲烹瀹之具備馬別而下
山稍北遂折而東下甚峻二里至其麓路北有澗自雪山東
南下隨之東半里有木橋渡澗西北逾山爲中甸道余從橋
南東行半里轉而東是爲崖脚院倚山東向其處居廬連絡
中多板屋茅房有瓦室者皆頭目之居屋角俱標小旗二面
風吹翩翩搖漾於天桃素李之間宿雨含紅朝烟帶綠獨騎
穿林風雨淒然反成其勝院東南有窪地在邨廬間中澗無
水尙有亭臺堤柳之形乃舊之海子環爲園亭者今成廢壑

矣又南二里有枯澗嵌地甚深乃雪山東南之溪南注中海者今引其水東行塢脊無涓滴下流澗中僅石梁跨其上度梁之東卽南隨引水行四里望十和邨落在西甚盛其南爲中海望之東南行其大道直北而去者白沙道也南四里有枯澗東西橫塢中小石梁南跨之又東五里東瞻象眠山已近通事向許導觀象鼻水至是乃東南行田間二里抵山下水從坎下穴中西出穴小而不一遂溢爲大溪折而南去二里析爲二道一沿象眠而南一由塢中倒峽過小石橋又析爲二夾路東西行五里至黃峯山北所引之水一道分流山

後而去一道東隨黃峯而南始知黃峯之脈自象鼻水北坡垂塢中南下至此結爲小峯當塢之口東界象眠山亦至此南盡西界山自中海西南環遶而北接十和後山南復橫開東西大塢南龍大脊自西而東列案於前其上烏龍峯獨聳文筆於西南木家院南峯廻峙雄關於巽位衆大之中以小者爲主所以黃峯爲木氏開百代之緒也從黃峯左腋南上西轉又一里出其南則府治東向臨溪而峙象鼻之水環其前黃峯擁其後闡其內樓閣極盛多僭制故不於此見客云先是未及黃峯二里有把事持書挈一人荷酒獻胙衝雨而

漁事
三
至以余尙未離解脫也與之同過府治前度玉河橋又東半里仍稅駕於通事小樓讀木公書乃求余乞黃石齋敘文併索余書將令人往省邀吳方生者先是木公與余面論天下人物余謂至人惟一石齋其字畫爲館閣第一文章爲國朝第一人品爲海宇第一其學問直接周孔爲古今第一然其人不見亦不易求因問可以親炙者如陳董之後尙有人乎余謂人品甚難陳董芳躅後來亦未見其繼卽有之豈羅致所及然遠則萬里莫儔而近則三生自遇有吳方生者余同鄉人今以戍僑寓省中其人天子不能殺死生不能動有

文有武學行俱備此亦不可失者木公慮不能要致余許以書爲介故有是請然尙未知余至府治也使者以復東返前繳冊大把事至以木公命致謝且言古岡亦艱於行萬萬毋以不貲蹈不測蓋亦其托辭也然聞去冬亦曾用兵吐蕃不利傷頭目數人至今未復獵羅古宗皆其北境相接中途多恐外鐵橋亦爲焚斷是日雨陣時作從樓北眺雪山隱現不定南窺川甸桃柳繽紛爲之引滿焉是方極畏出豆每十二年逢寅出豆一番互相牽染死者相繼然多避而免者故每遇寅年未出之人多避之深山窮谷不令人知都鄙間一有

染痘者即徙之九和絕其往來道路為斷其禁甚嚴九和者乃其南

鄰在文筆峰南山大脊之外與劍川接壤之地以避而免於出者居半然五六十歲

猶惴惴奔避木公長子之襲郡職者與第三子俱未出以舊

歲戊寅尚各避山中越歲未歸惟第二第四名宿新入者俱

出過公令第四者啟來候求肄文木家院焉

初九日大把事復捧禮儀來致謝酬校書之役也鐵皮褥一黃金四兩

再以書求修雞山志并懇明日為其四子較藝木家院然後

出關院有山茶甚巨以此當折柳也余許之是日仍未霽復

憩通事樓其俗新正重祭天之禮自元旦至元宵後二十

日數舉方止每一處祭後大把事設燕燕木公每輪一番其

家好事者費千餘金以有金壺八寶之獻也其地田畝三

年種禾一番本年種禾次年即種豆菜之類第三年則停而

不種又次年乃復種禾其地土人皆為麼些國初漢人之

戍此者今皆從其俗矣蓋國初亦為軍民府而今則不復知

有軍也止分官民二姓官姓木初俱姓麥自漢至國初太祖乃易為木民姓和

無他姓者其北即為古宗古宗之北即為吐蕃其習俗各異

云古宗北境雨少而止有雲絕無雷聲其人南來者至麗

郡乃聞雷以為異麗郡北中甸之路有北巖高闊皆三丈

崖石白色而東向當初日東升人穿彩服至其下則滿崖浮彩騰躍煥然奪目而紅色尤爲鮮麗若鏡之流光霞之幻影日高則不復然矣

初十日晨餐後大把事復來候往木家院通事具騎而大把事忽去久待不至乃行東向半里街轉南北北去乃象眠山南垂通安州治所托南去乃大道半里過東橋於是循溪南岸東南行三里有柳兩三株在路右塍間是爲土人送行之地其北有塢東北關甚遙蓋雪山之支東垂南下者兩重初爲翠屏象眠與解脫十和一夾而成白沙塢再爲吳烈東山

與翠屏象眠再來而成此塢其北入與白沙等其北麓脊處卽金沙江逼雪山之麓而東者東山之外則江流南轉矣脊南卽此塢中有溪自東山出灌溉田疇更廣由此塢東北逾脊渡江卽香羅之道也塢中溪東南與玉河會於三生橋之東又有水西南自文筆山沿南山而東轉隨東圓岡之下經三生橋而東與二水會於是三水合而成漾共江之源焉東員岡者爲麗郡東南第一重鎖鑰蓋南大脊自西來穹爲木家院後高峯大脊從此南趨鶴慶其東下者爲邱塘關其東北下者環轉而爲此岡直逼東山之麓東三水爲一沿東山

南下而出邱塘東峽自七和馮密而達鶴慶岡首迴環向郡
南山之溪經其下鞏橋度之曰三生橋橋北有二坊兩三家
爲守者自柳塘至此又五里矣其北皆良疇而南則登坡焉
一里升坡之巔平行其上右俯其坡內抱下闊平塢直北接
郡治眺其坡斜削東下與東山夾溪南流坡間每有邨廬就
窪傍坎桃花柳色罨映高下三里稍下就窪有水成痕自西
而東下於溪又南逾一坡度板橋而南則木家院在是矣先
是途中屢有飛騎南行蓋木公先使其子至院待余而又屢
令人來示其款接之禮也途中與通事者輒唧唧語余不之

省比余至而大把事已先至矣迎入門其門南向甚敞前有
大石獅四面墻垣之外俱巨木參霄甫入四君出迎入門兩
重廳事亦敞從其右又入內廳乃拜座進茶卽揖入西側門
搭松棚於西廡之前下藉以松毛迤西重禮也大把事設二
棹坐定卽獻紙筆袖中出一小封曰家主以郎君新進諸生
雖事筆硯而此中無名師未窺中原文脈求爲賜教一篇使
知所法程以爲終身佩服余領之拆其封乃木公求余作文
并爲其子斧正書後寫一題曰雅頌各得其所余與四君卽
就座拈毫二把事退候階下下午文各就余閱其作頗清亮

二把事復以主命求細爲批閱余將爲舉筆二把事曰餒久矣請少遲之後有茶花爲南中之冠請往一觀而就席蓋其主命也余乃從之由其右轉過一廳左有巨樓樓前茶樹盤蔭數畝高與樓齊其本徑尺者三四株叢起四旁萎蕤下覆甚密不能中窺其花尙未全舒止數十朶高綴叢葉中雖大而不能近覷且花少葉盛未見燦爛之妙若待月終便成火樹霞林惜此間地寒花較遲也把事言此樹植與老把事年相似屈指六十餘余初疑爲數百年物而豈知氣機發旺其妙如此已還松棚則設席已就四君獻歛復有紅瓊麗鎖之

惠二把事亦設席坐階下每獻酒則趨而上焉四君年二十餘修質清俊不似邊陲之產而語言清辨可聽威儀動盪悉不失其節爲余言北崖紅映之異時余欲由九和趨劍川四君言此道雖險而實近但此時徙諸出豆者在此死穢之氣相聞而路亦絕行人不若從鶴慶便館味中有柔猪麓牛舌俱爲余言之縷縷可聽柔猪乃五六觔小猪以米飯喂成者其骨俱柔脆全體炙之乃切片以食麓牛舌似猪舌而大甘脆有異味惜余時已醉飽不能多嘗也因爲余言其地多麓牛尾大而有力亦能負重北地山中人無田可耕惟納麓牛銀爲稅蓋鶴慶以北多麓牛順甯以南多象南北各有一異獸惟中

隔大理一郡西抵永昌騰越其西漸狹中皆人民而異獸各不一產騰越之西則有紅毛野人是亦人中之鼈象也抵暮乃散二把事領余文去以四君文畀余曰燈下乞細爲削抹明晨欲早呈主人也余領之四君送余出大門亦馳還郡治仍以騎令通事送余東南二里宿卹岷家余挑燈評文就臥其西廡

十一日味爽通事取所評文送木家院就院中取飯至已近午矣覓負擔者久之得一人遂南行二里抵南山下循山東南一里下越一坑底仍東南上二里出邱塘關關內數家居

之有把事迎余獻茶其關橫屋三楹南向踞嶺上第南下頗削而關門則無甚險隘也其嶺自西大脊分支東突與東山對夾漾共江於下關門東脊臨江之嘴巖塔於上爲麗東南第二重鎖鑰隔江之東山至是亦雄奮而起若與西大峰共爲犄角者關人指其東麓卽金沙江南下轉而東南趨浪滄順州之間者此地有路半日逾此嶺又一日半而東南抵浪滄衛出關門通事以騎返余遂同擔夫仍南向就小道下山抵鶴慶

師範曰滇固山之苑而水卽貫其中焉山有特立者有並峙

滇黔
者有相連數百里名雖異而實爲一山者又或一山而中包
數山一山而上起數山者詭誕不可名狀也水有數流而滙
爲一流一川而分爲數川者有兩川勢敵合流數里而仍分
二川者有性之勁弱不同色之清濁互異或絕流各出竟不
相通者其詭誕亦不可名狀也蔡氏云山本同而未異水本
異而未同邱氏云山體陽而用陰用陰故靜而能深天下之
幽奇險奧莫過于山水體陰而用陽用陽故動而多變天下
之縱橫恣肆莫過于水滇之山層峰峻嶺滇之水飛瀑驚湍
尤極幽奇險奧縱橫恣肆之態矣至老君乃南龍之祖金沙

實大江之源竟委尋端鑿鑿可考而于攻守利害昉元和郡
國志例間標一二覽者尙毋忽視哉丁卯大雪後一日北風
甚劇缸面冰厚二寸許呵凍書此

本朝全祖望昆明池考

昆明池在昆明滇池在滇本屬二水吾以輿地考之昆明爲
今雲南之大理府滇爲今雲南府滇自楚莊躋之後世爲國
王卽以池名其國而昆明之屬無君長又爲滇徼外之蠻漢
之通西南夷也本求身毒國以達大夏于是發使滇國滇王
爲之求道以隔昆明閉漢使不得通武帝聞而怒欲討之聞

其地有昆明池乃於長安西南作昆明池以習水戰迨兩越既定滇王舉國內附而昆明卒不通郭昌將兵擊之無功而還自漢至隋永昌諸夷相率隸郡縣獨昆明未附通鑑唐武德四年昆彌遣使內附昆彌卽昆明也時有西瀾河蠻東瀾河蠻通名昆彌是昆明之當在今大理無疑乃史漢西南夷傳三輔黃圖皆曰昆明有滇池武帝象之於長安則今雲南府之滇池亘古以來未有移也昆明尙在其西南相去九百里而忽接而言之遂使今雲南府之首縣卽以昆明名誤矣且以事情言之滇王未嘗得罪于漢漢無故圖其地理而欲

伐之無是理也以軍行之道言之漢若欲伐昆明乃去其國千里豈能遠致昆明之師而戰於滇更必不可信之說也予疑此久矣但未得其証以實之偶讀杜岐公通典曰西洱河一名昆彌川漢武帝象其形鑿之以習水戰非滇池也古有昆彌國亦以此名然後恍然蓋今滇雲全省之水其最險厄爲迤東西之要者莫如西洱河卽古葉榆水之北出者自浪穹縣罷谷山滙諸流合點蒼山十八川而爲巨浸水經注謂諸葛丞相戰於榆水之南是也史萬歲擊南甯渡西洱河破三十餘部韋仁壽將兵五百循西洱河開地千里梁建方破

松外蠻奇兵奄至西洱河東西蠻驚思請降鮮于仲通李宓皆以十萬之師覆於洱河是洱河者大理一道之湯池也昆明恃此水負固以阻漢使故漢欲募其水道於京師使士習之而卒無如之何也若滇池則不然史言其源深廣而流淺狹四面平敞雖方三百里之廣然昔人有事于南中未有以爲戰地者而況乎武帝之所欲討者非滇也予又考唐雋州都督劉伯英上疏言松外諸蠻暫服亟叛請擊之西洱河天竺道可通也天竺卽古之身毒伯英之言猶是漢人自昆明通道之故智則洱河之爲昆明無可疑者滇南自蒙氏歸唐

而後其與吐蕃爭者亦唯昆明異牟尋旣取昆明遂食鹽池徙洱河七種蠻吐蕃以兵八萬屯昆明爭之韋臬圍之不能克則昆明之險可知也若高宗時唐九徵擊吐蕃于姚嶺虜以鐵絙梁漾濞二水通西洱蠻築城戍之九徵毀絙夷城建鐵柱於滇池以紀功其所云滇池亦指洱河蓋襲漢史之譌九徵戰勝于大理不應建柱于千里而遙之滇池獨怪自遷固以來其訛相襲雖有岐公之言莫據之以正舊史元段世之答梁主曰若欲修好當待昆明池作西洱河豈知夫西洱河之本爲昆明池也作昆明池考

按昆明在今永甯永北麗江間隋曾以麗江爲昆明軍至今
之昆明乃置于元前有昆州昆澤縣昆澤似因滇池然未聞
其爲昆明池也予屢舉通典與萬香海言之得謝山是考而
益信○夷自名其種大曰昆小曰與按昆夷已見周詩其後
孟津八國鬻濮已居其二王曰逃矣西土之人是與巴庸俱
引入王畿矣有昆瀾川卽有昆瀾池有昆瀾嶺今名瀾渡之
稱未審起自何代其西河曰昆雌江其東河曰昆雄江府志
州志蒙志無不皆然予以爲雌雄之義毫無理解要必瀾西
瀾東之誤或昆瀾東江昆瀾西江後去瀾留昆不誤以昆爲

昆亦未可定然則瀾也昆也雄也東也雌也西也訛以音者
也昆也昆也訛以形者也由是以推密只當曰瀾止密底當
曰瀾底數千年蒙晦一旦豁然殆亦山川之靈有以默啓之
歟此與永昌之非金齒同關典要生斯土者尚無謂予爲不
經之談也庚午十月病起記

江東

三

江東
安邑月正
天
管
天
心
區
口
母
誰
如
人
區
口
公
家
集
集

